

塞西沙涼西

外河

州州河

雜舊

識事記記記



西 河 記

喻 歸 纂

編主五雲王

編初成集書叢

種四他其及記河西

中華民國二十五年十二月初版

密

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

本館據二酉堂叢  
書本排印初編各  
叢書僅有此本

## 西河記序

按隨唐志。西河記二卷。元和姓纂。東晉有喻歸譔。西河記三卷。廣韻作二卷。喻作諭。音樹。唐志缺譔人名。蓋記張重華事也。十六國春秋。晉遣侍御史喻歸。拜張重華護羌校尉。涼州刺史。假節。重華謀爲涼王。不肯受。詔使親信人沈猛與歸言。歸折之。西河記作於此時也。今存者祇數則。余撮而錄之。以備佚簡。姑臧記二事。並附于末。

# 西河記

晉 侍御史豫章喻歸纂

清 武威張 澍輯錄

故臧匈奴故蓋臧城也。城不方。有頭尾兩翅。名蓋鳥城。初學記

涼州罪人。於市將刑。忽有一白雄雞飛於人邊。請命。引頸長鳴。伏地向吏。驅之去。輒來。刺史張義免其坐。

藝文類聚  
太平御覽

張駿立謙光殿。成後。池水中有五龍。晝日見。移時乃滅。水通變綠色。駿因作鑄銅龍以厭之。後卒不勝此

殿。太平御覽

澍按。吳淑事類賦注。引末句云。駿尋卒。又一本引池下無水字。晝下無日字。因作卽勝作升。

西河無蠶桑。婦女著碧纈裙。加細布裳。著纈襦襖。以外國五色錦爲袴褶。北堂書鈔  
太平御覽

澍按。一本引布裳下有且爲戎狄姓五字。

貸我東牆。償我白梁。漢書注  
齊民要術  
史記索

趙倫妻死。遺雪竹搔頭階下。不數日化爲楊梅。華朶如撒。時人異之。太平御覽  
引姑臧記

錢芸士好讀離騷。手不暇揭。忘去肉味。半月如齋。太平御覽  
引姑臧記



涼州記

段龜龍纂

本館據二酉堂叢  
書本排印初編各  
叢書僅有此本

# 涼州記序

考隨志。僞涼右僕射張諮。纂涼記八卷。記張軌事。唐志作十卷。世說注。引張資涼州記。又僞涼大將軍從事中郎劉景。纂涼書十卷。亦記張軌事。史通外篇云。前涼張駿十五年。命其西曹邊瀏。集內外事。以付秀才索綏。作涼國春秋五十卷。張重華護軍將軍劉慶在東苑。專修國史二十餘年。箸涼記十二卷。又云建康太守索暉。從事中郎劉昞。各箸涼書。昞卽景。唐諱昞改景。後魏書高謙之傳。謙之以父舅氏沮渠蒙遜。曾據涼土。國書闕漏。謙之乃修涼書十卷。宋書大且渠傳。元嘉十四年。茂虔表上獻涼書十卷。史通又云。宗欽涼記。記沮渠氏。隨志有拓跋涼錄十卷。無纂人名。唐志入編年類。史通外篇云。失名記禿髮氏。若段龜龍涼州記。乃記呂光事也。藝文類聚。初學記。太平御覽諸書。引。或作西涼記。或作涼州記。隨志八卷。唐志云十卷。余輯得二十餘事。內有張諮涼記二則。赫連氏涼書三則。蒙遜涼書二則。亦附於末。

# 涼州記

北涼著作佐郎段龜龍纂 清 武威張 澍編輯

呂光字世明，連結豪賢，好施待士，身長八尺四寸，目重瞳子，左肘生寅印，性沈重質略，寬大有度量，時人莫之識，惟王猛布衣時，異之曰：「此非凡人。」太平御覽

澍按：光，略陽氏人，呂婆樓之子，以石氏建武四年生於枋頭，夜有神光，舉家異之，遂以光爲名，寅字當作因，因字古作突，因形近而誤。

呂光左肘生因印，及征南城，印內隱起文字曰「巨霸」。太平御覽

澍按：後涼錄：「光伐龜茲，王帛純拒命不降，光軍城南五里爲營，肘因印成文，此止云征南城，未分析。」

呂光太安二年，龜茲國使至，貢寶貨奇珍汗血馬，光臨正殿，設會文武博戲。太平御覽

呂光時，敦煌太守宋歆獻同心之梨。初學記

澍按：十六國春秋：「後涼錄：宋歆，姑臧人，藝文類聚引無宋歆二字，此係太安三年事。」

呂光太安三年，白雀巢於陽川，令蓋敏室。太平御覽

澍按：蓋一引作郭誤，後涼光下令諸臣爲之賦，時獻賦及詩者凡百餘人。

呂光時，張掖金澤有麟見，羣獸皆從，改元麟嘉。太平御覽

澍按。後涼錄。作金澤縣。藝文類聚引元作年。此時爲晉孝武大元十四年三月。光卽三河王位于南郊。置百官改元也。

呂光太安三年。白燕游酒泉郡。黑燕列從。藝文類聚

澍按。太平御覽引三年作年間。又按後涼錄作太安二年秋七月。白燕翔于酒泉。衆燕成列而從之。此作三年訛。

呂光稱王。遣使市六璽於于闐。太平御覽

澍按。此麟嘉元年事。又造刀一口。銘其背曰麟嘉。

涼王呂光麟嘉二年。以沮渠羅仇爲西寧太守。往年蝗蟲所到之處。產子地中。是月盡生。或一頃二頃。覆地跳躍宿昔變異。王乃躬臨撲蟲。幸揚川濠水北。大駕所到。蟲尋殞盡。是以麥苗損耗無幾。藝文類聚

呂光麟嘉五年。疏勒王獻火浣布。善舞馬。太平御覽

呂光龍飛二年。太常郭騰反叛。騰以箋書招誘楊軌推爲盟主。軌性直。不慮騰之傾危。西河太守程肇諫軌曰。將軍之於呂主。可謂臭味是同。今欲釋同心託異類。背龍頭尋蛇尾。非將軍之高算也。太平御覽

澍按。後涼錄。姑臧涼人張捷宋生等。招集戎夏三千餘人。反于休屠城。與騰共以書箋招誘後將軍楊軌。推爲盟主。程肇諫云云。軌不從。自稱大將軍涼州牧西平公。

郭騰略地之際。王孫八人年幼。悉隨乳母先在東苑。騰遂盡投王孫於鋒刃之上。或枝分節解。飲血盟衆。

觀者無不掩目塞心。而磨意氣。翬然。太平御覽

澍按。郭磨。西平人。少明式易。善天文占候。性褊酷。不爲士庶所附。戰敗。奔降西秦。乾歸敗。入仕姚興。爲

太史令。爲興殺。

呂光時。州人陳冲。得玉璽。博三寸。長四寸。光澤無文。向日視之。字在腹中。有三十四字。言光當王。北堂書鈔。太平御覽。

澍按。後涼錄。陳冲作陳平仲。博作廣。光澤無文。作直看無文字。又按此太安三年事。

呂光時。有任射者得罪。樹據後涼錄。補此二字。自匿爲王欣家奴。發覺應死。射有奇巧。王爾魯般之儔也。故赦之。及

大殿歲久傾敗。任射運巧致思。土木俱正。太平御覽。

呂光破龜茲。始獲鳩摩羅什。光死。子續立。戲弄羅什。或共棋博。及殺子。云斫胡奴頭。什曰。不斫胡奴頭。胡

奴斫人頭。後續弟字曰胡奴。果斬續頭。太平御覽。

澍按。續後涼錄作纂。爲呂超所殺。超光弟寶子。小字胡奴。一引作秦記。

呂纂咸寧二年。夜見龍出東廂井中。行大殿前。蟠臥。旦見其麟甲足跡。尚有溼處。太平御覽。

澍按。呂纂一引作慕容氏誤。又按後涼錄。纂以爲美瑞。號大殿爲龍翔殿。又有黑龍行于當陽九宮門。

改爲龍興門。

呂纂咸寧二年。胡安璩等發張駿墓。得眞珠簾箔。雲母屏風。琉璃榼。白玉樽。受三升。赤玉簫。紫玉篴。珊瑚

鞭、瑪瑙鍾、黃金勒。太平御覽。

澍按：後涼錄：胡安璩作胡璩，一作胡安枚。纂誅璩黨五十餘家，遣使弔祭璩，繕修其墓。太平御覽又引云：盜發張駿陵，得鞭飾以珊瑚。又引云：有人發張駿墓，得真珠簾箔、雲母屏風。又引云：胡安璩等發張駿墓，得瑪瑙鍾、白玉樽、受三升琉璃榼。

太常卿楊穎上疏諫呂纂飲酒過度，出入無恤。纂曰：不有直亮，誰匡邪僻之君也？纂雖有此諫，終不能改。太平御覽。

澍按：後涼錄：咸寧三年春二月，纂昏虐任情，游田無度，荒耽酒色，不恤政事。太常楊穎諫云云。呂纂常與左右因醉騁馳游獵，或馬奔於坑塹之間。侍御史王回中書侍郎王儒控馬諫曰：千金之子，坐不垂堂。萬乘之主，清道而行。奈何去輿輦之安，冒奔馳之危，銜檠之變動，有不測之禍？愚臣竊所未安，敢以死爭。願陛下宜憶袁盎攬轡之言，不令臣等受譏千載。纂不納。

澍按：初學記引云：纂漸馳游獵，或馬奔溝塹之間。殿中侍御史王回控馬諫曰：陛下宜憶袁盎攬轡之言，所引不全。據十六國春秋補之。宜憶後涼錄作遠思。

隱王張美人，生色壯豔，出家爲道。呂隆逼之，乃自投張掖門樓，雙股頓折，口誦經。顏色自若。俄而死。太平御覽。

澍按：張氏敦煌人。隱王呂紹之美人。年十四，紹見殺，便請爲沙門。

呂纂明光宮在漸臺西，以金玉珠璣爲簾箔。北堂書鈔：太平御覽。

澍按呂纂一引作呂光。

永嘉五年。枹罕令嚴羌姜產一龍一鷲。鷲尋飛去。龍十五日風雨迎之。大風吹拔張掖郡大樹。經宿還立。  
北堂書鈔

澍按太平御覽引作前涼錄。

李昂三日讌于曲水。命羣寮賦詩。昂爲之序。  
太平御覽

先酒泉南有銅駝山。大雨雪。沮渠蒙遜遣工取之。得銅數萬斤。  
太平御覽

澍按一引作北涼錄。

焉支山在郡西界。東西百餘里。南北二十里。有松柏五木。其水草茂美。宜蓄牧。與祁連山同。一名刪丹山。  
太平御覽

澍按郡指酒泉。西陽雜俎言祁連有四味木。未審卽五木否。又一引無末五字。

有青鹽池出鹽。正方半寸。其形似石。甚甜美。  
太平御覽

澍按西域記云。西海南有青鹽池。鹽方半寸。食味甚美。眞臘記云。山間有石。味勝于鹽。可琢爲器。梁杰公傳言交河之間。掘磧下數尺。有紫鹽。如紅如紫色。鮮而甘。其下文許有鹽珀。北戶錄。張掖池中生桃華鹽。色如桃華。隨月盈縮。今寧夏涼州地。鹽井所出青鹽。四方皎潔如石。山丹衛卽張掖地。有池產紅鹽。色紅。此二鹽卽戎鹽之青赤二色者。

祁連山。張掖酒泉二界之上。東西二百里。南北百餘里。山中冬溫夏涼。宜牧牛。乳酪濃好。夏寫酪不用器物。刈草著其上不散。酪特好。酪一斛得升餘酥。又有仙人樹。行人山中飢渴者。輒食之飽。不得持去。平居不可見。太平御覽

謝按唐書武德二年涼州刺史安修仁獻百年酥云飲之可延壽

昌松縣有鸞鳥城。魏改爲神鳥縣。張軌時有五色鳥集於其處築城。藝文類聚

張天錫字公純。安定烏氏人。張耳後也。曾祖軌。永嘉中爲涼州刺史。值京師大亂。遂據涼土。天錫纂位。自立爲涼州牧。苻堅使將姚萇攻沒涼州。天錫歸長安。堅以爲侍中。比部尚書。歸義侯。從堅至壽陽。堅軍敗。遂南歸。拜散騎常侍。西平公。

謝按晉中興書曰。天錫後以貧拜廬江太守。薨贈侍中。又按世說新語。王中郎甚愛張天錫。問之曰。卿觀過江諸人。經緯江左。軌轍有何偉異。後來之彥。復何如中原。張曰。研求幽邃。自王何以還。因時修制。苟樂之風。王曰。卿知見有餘。何故爲苻堅所制。答曰。陽消陰息。故天步屯蹇。否剝成象。豈足多譏。天錫明鑒穎發。英聲少著。

謝按此二則係張諮涼州記。世說注引之。附于此。又按晉書。張天錫爲涼州刺史。稱制西隅。旣爲苻堅所禽。用爲侍中。後于壽陽俱敗。至都。爲孝武所器。每入。言論無不竟日。頗有嫉己者。於坐問張。北方何物可貴。張曰。桑椹甘香。鷓鴣草響。淳酪養性。人無嫉心。

契吳山在縣北七十里。赫連勃勃北游契吳而嘆曰。美哉斯阜。臨廣澤而帶清海。吾行地多矣。自馬嶺以

北。大河以南。未有若斯之壯麗者也。

太平御覽

可藍山一名都盧山。皆涇水源。與笄頭山連互。赫連定勝光二年。敗於涼州。登可藍山。望統萬城。泣曰。先

帝若以朕承大業。豈有今日乎。

太平御覽

澍按。可藍山在平涼縣。接百泉界。

赫連定據平涼。登此山。有羣狐繞之而鳴。射之竟不得一。定乃嘆曰。咄咄。此亦怪事也。

太平御覽

澍按。以上三則。係赫連氏涼書附錄之。



沙 州 記

段 國 纂